

Pol Uqa Jaqec Je Oso Efesas Tamanec Jaqiaden Aqunec Je

Pol uqa jaqec je i jaqen saenna uqa Rom ono uqana jona gihacdoc bilen. (Eu Aposel 28.16-31 feiga.) Jaqec je i uqana gug eu odi. Anut uqa ceteteh cunug ifanen eu saona gunnadec mahanadecca eu Kraisca gabanadeceb Kraisc uqa cunugnu ilo biligiannu gale dona. (Eu 1.10 feiga.) Odimej Anut uqa uqana dana cajaca age wele agena silailna cal mec biloloig eu age qila Kraisca gabanadeceb cebac bilegina eunu cisdoqagannu gale dona. (Eu 2.4-6 feiga.) Odimej Kristen cunug age wawaga osol biluqagannu gale dona. (Eu 2.19-22 feiga.)

Jaqec je ina dac 1na Pol uqa Anutna eeladec uum adec eunu je mati jaqena. Eeladec uum adec eu odi. Anut uqa Juda dana qeeca, Juda danaca gami nesili ehadeceb age cunug Kraiscnu wawaga melececeb gabandumeig sihunegul osol bilegina. Eu Jisasna cabi. Anut uqa Kraiscna cal mecna uqana dana cajaca ceseli fajaden. Odimej uqa Kis Gun aden. Kis Gun eu ceteh me bahic Anut uqa uqana dana cajaca adigiannu mugumuga mec je maden eu cunug oqagannu gihin adec. (Eu 1.14 feiga.) Dac 2na Pol uqa Kristen cunug age Kraisca gabandu bilegina, eunu age wawaga osol bilimeig Anutna kobol cunug toodu odoqagannu jaqena.

Jaqec ina Pol uqa Kristen dana cajaca age Kraisca gabanadec bilegina eunuca, age si-

hunegul osol bilegina eunuca camasac iha-cadecnu galolo je mati madena. Uqa Anutna dana cajaca age deweg osol bilegina, odocob Kraiss uqa deweg eu uqana ilo eunu galolo je oso madena. (Eu 4.1-16 feiga.) Odimeis uqa Anutna dana cajaca age jo osol bilegina, odocob Kraiss uqa jo eu uqana nah man nohinoh eunu galolo je oso madena. (Eu 2.19-22 feiga.) Odimeis uqa Anutna dana cajaca age aideg oso, odocob Kraiss uqa aideg eu uqana gemug eunu galolo je oso madena. (Eu 5.22-32 feiga.) Jaqec je ina ege ceteteh me bahic Anut uqa uqana dana cajaca odadecnu gale dona eu fi cuhadoqona.

Je Dunuhnu Dado Mec

1. Feele adec je (1.1-2)
2. Anutna cisdoc: Kraiss uqa kobolkobolca, uqa ilo bilina (1.3-14)
3. Pol uqa Kristen age Anutna cisdocca, uqana gagadic odocca eunu du cuhadoqagannu inondona (1.15-23)
4. Anut uqana cisdoc toodona eu odi (dac 2-3)
 - A. Anut uqa uqana eeladec uum adecna uqana dana cajaca cahahaadena (2.1-10)
 - B. Kraiss uqa Juda danaca Juda dana qee eundecca uqana na babalecna tanawaden (2.11-18)
 - C. Juda danaca Juda dana qee eundecca age qila sihunegul osol bilegina (2.19-22)
 - D. Anut uqa je jahunec camasac men eu Kraissna tamanecna Juda dana qee eundec ageha Anut huqanehul bilegina (3.1-13)

- E. Pol Anut uqa uqana gagadic odoc Kristen adeceb age Anutna Kisna wawaga gagadic tawigiannu inondona (3.14-21)
- 5. Krai tamanec adi wawaga osol biluqagan (4.1-6.20)
 - A. Age Kis Gunna cisdoc osol biluqagan (4.1-6)
 - B. Age dana cajaca wasimeig Kraiwe caloqagan (4.7-16)
 - C. Kristen age agena cisdocca, wawaga madecca waticduadeceb haun ibuldugian (4.17-5.20)
 - D. Age cotogail agena je todocobtoodocoboigale (5.21-6.9)
 - 1. Krai binan sulecnu age cotogail agena je todocobtoodocoboigale (5.21)
 - 2. Gemugail aidagailca adi osol biluqagan (5.22-33)
 - 3. Mel simca age anagail memegailca adi osol biluqagan (6.1-4)
 - 4. Begabeg meh cabi danaca agena cofadec danaca adi osol biluqagan (6.5-9)
 - E. Seten cadecnu age Anutna gagadic odoc umei uqa uenna tatawi gagadic meigale (6.10-20)
- 6. Cit qoc je: Feele adecca eeladec jeca (6.21-24)

¹ Ija Pol, ija Krai Jisasna aposel. Anut uqana cisdocna ija Krai Jisasna aposel miten. Ija Anutna dana cajaca qagoc age Efesas bilegina, age Krai Jisasna jic tutuc cobogina eu age je i jaqiadigina. ² Memige Anutca Jisas Krai Tibudca alena eelgec uum igecca malol bilecca adesiale.

Anut uqa ege eeldoc cunug Kraiswa igen

³ Anut ege Kraisca gabangi biluquna eunu eelgen, uqa eeldoc cunug eu saona gunnadec ege dolonige cesuldocnu igen. Eunu ege egena Tibud Jisas Kraisa uqa Memeg Anut binan suluqale!

⁴ Anut maha qee ifanec ninijen uqa ege uqana bilitoqannu Kraisca gabandoc bilec euna wele nesili ehigen. Uqa ege gun bilecnuca, cahuldocca qee uqa amegna bileqannu nesili ehigen. Anut uqa nalunige menanu ⁵ uqa casac wele odi cisdon, uqa Jisas Kraisa umna ibulgeceb ege uqa melahul bileqannu ec cisdon. Ceteu eu uqana cisdoc gale docca. ⁶ Anut uqana eelgec uum igec eu binanca bahic! Uqa Melah uqa nalug mena eu ege uqaca gabandu biluquna eunu Anut eelgec uum igec bagolwe igen. Eunu ege Anut binan suluqale!

⁷ Anutna eelgec uum igec eu ben bahic! Kraisa ege ceseli fajigecnu cal men. Uqa egena silail cagasigecnu uqa golac basecdocob nen. Eunu ege Kraisca gabandu biluqunanu ege besigec biluquna. ⁸ Anut uqa uum igec eu geh bahic igen! Anut uqa uqana doc meca, uqana cisdoc silec cunugca eu igen. ⁹ Anut uqa ceteu odigiannu Kraisa cabi ocna odigian ec wele cisdon. Euqa uqana cisdoc eu jahuni bilen. Odimeu qila Anut uqa uqana gale doc toodumeu uqana cisdoc jahunec eu ihaceceb dom. ¹⁰ Uqana ceteu odigiannu cisdon eu odi. Uqa ceteteu cunug ifanen eu dado mumudeb lili saen uqa wele gadac menna uqa ceteteu cunug, eu saona gunnadec mahanadecca, Kraisca gabandocob Kraisa uqa cunugnu ilo biligian ec cisdon.

¹¹ Anut uqa uqana cisdoc gale docca toodona, eu uqa ceteħ oso odocnu cisdonu euha uqa odocob calena. Odimeı wele bahic gug qoc saenna uqa uqana gale docna ege Juda uqa ege Kraısca gabandoqannuca, ege uqana dana cajaca bileqannuca nesili ehigen. ¹² Ege Juda, ege aquniadec Kraısnu wawige meleceeb toodom eu ege uqa binan fuladocca, gagadic odocca sulecnu nesili ehigen.

¹³ Ageha age mele je wele dah mein, eu me je euna Anut cahahaaden. Odocob age Kraısnu wawaga meleceeb Anut age Kraısca gabanadimeı uqana je hahun wele maden eu toodumeı Kis Gun aden, Kis Gun eu Anut uqa uqana dana cajaca ceteħ me adigian ec maden eu ege oqan uqana sisi mec. ¹⁴ Ege ageca Kis Gun wele om. Eunu ege doqona, hibna egeha ceteħ me bahic Anut uqa uqana dana cajaca adigiannu mugumuga mec je maden eu cunug oqan. Ege Anut uqa ege cahahageceb ceteħ me bahic eu umeb ege uqaca besigec bileqannu sumudi biluquna. Eunu uqa binan suluqale!

Pol uqa Anut Efesas tamanec doc silecca adi-giannu inondon

¹⁵ Ageha me je dah mimeig Kraısnu wawaga meleceeb Kis Gun oin gug inu ija agenu inondugina. Odocob ija age Jisas Tibudnu wawaga melecca age Anutna dana cajaca qagoc cunugnu nalunuga mecca ec dah mem. ¹⁶ Eunu ija agenu Anut gaid hetaga dugina. Ija ijana inondocna agenu gaid cisdugina. ¹⁷ Ija agenu Jisas Kraıs egena Tibudna Anut, uqa Memige fuladoc benca

gagadic odocca, odi inondugina. Anut uqa doc silecca cisdoc fogo adecca adeiale, odocob age uqanu du cuhadoqagannu ec inondugina. ¹⁸ Ija Anut agena cisdoc fogo duadeceb eu age fulacdocca foqagannu gale tena. Eunu age uqana dana cajaca bilegina eu age cel ceteh me age ocnu utaaden eunu sumudi bilegina ec doqagan. Odocob age Anutna dana cajaca qagu bilegina eu cehewanaga me bahic hibna adigian ec mugumuga mec je maden eunu doqagan. ¹⁹ Odocob ege Anutnu wawige meleena uqana gagadic odoc euna cesulgena eu gagadic bahic ec doqagan. Anutna gagadic odoc ege saniyecnu ihoc qee. Uqa uqana cabi eu ege uqana gagadic odocna oqona. ²⁰ Anut uqa uqana gagadic odoc euna wele uqana cabi eu Kraisna u hedon. Uqa Kraiscal mecnadec tulidumei saona gunna ehudi ti uqa eben meulana isec mudeceb bilen saen euna uqa uqana cabi u hedon. ²¹ Odocob Krais uqa ohis bahic bilia. Uqa king bilec cunugca, ilo bilec cunugca, gagadic odoc cunugca, cofadec cunugca eu saona mahanaca bilegina wooladec ohis bilia. Odocob uqa dana qila saen ina ijanagaca bilegina isi saen hibna ijanagaca biluqagan eu cunug wooladec bilia. ²² Anut uqa ceteteh cunug Krais jaih bisalu men. Odimeu uqa tamanec cunugnu ceteteh cunug agena ilo bahic biligiannu muden. ²³ Tamanec eu Krais deweg. Krais uqa ceteteh cunug am beceb asaneginawe eu odi tamanec eu Krais am beceb asanen.

*Ege dana cajaca cal mec bilolob eu Anut uqa ege
Kraisca gabangeceb cebac biluquna*

¹ Wele age silailca kobol cahuldocca eu odoloig, odocob eu aqeceb cal mec biloloig. ² Saen euna age maha uqana qisol mec kobolna coboloig. Age buga me qee saona bilegina eu agena ilo toodoloig. Kis me qee gagadicca eu uqa dana cajaca age Anutna je tefacdogina eu wawaga dunuh cabi ona. ³ Eu mele, ege cunug wele dana cajaca eundec gemo bilolob, odocob ege dewenigena gale gec me qee eu toodolob. Ege dewenigenaca egena cisdocnaca gale gec me qee eu toodu odolob. Eunu ege Anut ameg me qee wadagec ocnu ihoc bilolob. Ameg me qee wadacadece eu Anut saciadon nijia, uqa dana cajaca cunug uqana je tefacdogina eu wadacadigiannu nijia.

⁴ Euqa Anutna waug qoc eu am bec bahic, odimeu uqa egenu nalunige mec eu ben bahic. ⁵ Ege egena silailna cal mec bibiluqun uqa oigimeu Kraisca gabangeceb cebac biluquna. Anut uqa uqana eelgec uum igeena cahahaaden. ⁶ Odocob uqa ege Krais Jisasca gabangi uqaca tuligimeu ehigi ti uqaca saona gun ohis migeceb ege uqaca king biluquna. ⁷ Uqa eetanu odi odon? Uqa ege Jisas Kraisca gabangec biluquna eu uqana eelgec uum igecca uqa egenu nalunige mecca eu me bahic cunug amagana hibna saen cunugna ihacadigiannu odi odon. ⁸ Ge, Anut uqa uqana eelgec uum igeena age wawaga meleeceb cahahaaden. Odocob eu agena odocna qee, eu Anutna bagol igece himec. ⁹ Eu dana agena odocna qee,

eunu dana oso uqa culai madi, Anut uqa ijana odocnu cahahaten, odi cain madeiaun. ¹⁰ Ge, Anut uqadodoc ege migen. Uqa ege Krai Jisasca gabangec cabi me oqannu migen. Anut uqa wele cabi me oc eu ege jic euna cobeqannu saciaddon.

Krais uqa Juda danaca Juda dana qee eundecca sihul lecis gabanaleceb ale osol mesin

¹¹ Age cidoiga, Juda dana age dewenega cagu qoc kobol odogina eu Efesas age dewenega cagu qee qoc egina. Je madegina eu kobol eu dana age himec dewenegana odogina. Eunu age wele adi biloloignu cidoiga. ¹² Age saen euna Krai qisadoc bilein. Age Isrel sihulha qisadoc bilein. Anut uqa uqana bal cehec je mamadien euna uqana je hahun qee dah melein. Age maha ina Anutca qee bilelein, odocob age Anut uqa cahahaadecnu qee susumudi bilelein. ¹³ Wele age Anut qisadoc bahic bilein. Euqa qila Krai uqa agena silail cagasiadecnu uqa golac basecdocob nen. Eunu Anut age Krai Jisasca gabanadimeihadeceb age Anut cemenug bahic bilegina. ¹⁴ Ge, Krai uqa malol bilec egeca ahon. Wele Juda danaca Juda dana qee eundecca sihul lecis ale cadolosi. Cadec eu hih cehec benwe gemona tawoloi. Euqa Krai uqadodoc dewegna hih cehec ben eu wagalimeihadeceb age Anut cemenug bahic bilegina. ¹⁵ Uqa Mosesna loo jeca Juda agena loo je cunugca cacu qelen. Uqa sihul lecis eu gabanaleceb alena cud-unna uqadodoc dewegna dana haun oso ifani-giannu odi odon. Eunu uqa malol bilec muden. ¹⁶ Uqa na babalecna cal mennu sihul lecis eu

Anutnu tanawaleceb ege deweg osol bileqannu odon. Eunu uqa na babalecna cad mudeceb-mudecebec kobol eu qocob cal migiannu odon. ¹⁷ Odocob Kraiis humei uqa malol bilecnu me je qasali maden. Uqa Juda dana qee eundec age qisacdu bahic bilein eu qasali maaden. Uqa Juda dana cemenug bilein euha qasali maaden. ¹⁸ Ge, ege sihul lecis Kraiisnu Kis osolna Memige Anut cemenug hocnu ihoc oqona.

Ege Kristen cunug Anutna jo bahic

¹⁹ Eunu qila age jag dana cajaca age mahaca qee bileginawe qee bilegina. Age Anutna dana cajaca qagoc sihul osol. Age qila Anutna tal bilegina. ²⁰ Age Anut jo cehenwe odi. Uqa ege aposelca je hahun madec danaca jo i uqana nah cehen. Odocob Kraiis Jisas uqadodoc uqa jo i uqana nah man nohinoh bahic! ²¹ Uqa dih uqa jo eu uqana teful cunug hewena, odocob jo eu cuha jo ben caligian odona, eu Tibudnu cuha jo ben gun bilina. ²² Ageha age Kraisca gabanadec bilegina, odocob Anut uqa age uqana dana cajaca leih gami osoben gabanadena, eu age Anutna jo bahic tawegina, jo euna Anutna Kis biligiannu.

3

Pol uqa Juda dana qee eundec me je qasali maadecnu cabica

¹ Anut uqa Juda danaca Juda dana qee eundecca tanawadi gabanadeceb ege Kraiis deweg osol biluquna gug inu ija agenu inondugina. Ija, Pol, ija Kraiis Jisasna cabi dana, ija age Juda dana qee eundec cesuladecnu cabi ugina eunu

gihacdoc jona biligina. ² Anut uqa eeltec uum itimei uqa cesuladecnu cabi i ugennu iten ec dah mein eu mele cisdugina. ³ Je i Anut uqa ceteh i odigiannu eu wele jahunec bilen eu Anut uqa ija mateceb dom. Eunuwe ija je eu wele nag odi jaqiadiga. ⁴ Odocob age je i ija jaqiadiga eu sanijuqagan saen euna age ija cabi i Kraiss odonnu je jahunec eu du cuhadugina ec doqagan. ⁵ Wele bahic Anut uqa dana cajaca je jahunec i oso qee camasac mudi maadel. Qilaqa uqa uqana aposel gunca je hahun madec danaca je jahunec i Kisna camasac mudi maaden. ⁶ Je jahunecna gug eu odi. Age Juda dana qee eundecnu me je eu age egeca sihul osol, dewenige osol, odi calom. Odocob ege cunug ege Kraiss Jisasca gabangec ege uqana mugumige mec Anut uqa eunu je hahun maden eu oqan. ⁷ Anut uqa eeltec uum iteceb ija me je qasali maadecnu cabi dana calem. Uqa uqana eelgec uum igecca uqana gagadic odocca ija cabi i ugennu gagadic mitecnu iten. ⁸ Ijaqa ija Anutna dana cajaca qagoc cunug agena bisalu biligina. Euqa Anut ijanu waug qocob uqa Juda dana qee eundec me je qasali maadecnu cabi i ija ebenina men. Me je i eu Kraissna ceteteh me bahicnu madena, me je eu cehewanca bahic, ege dana cajaca sanijecnu ihoc qee. ⁹ Anut uqa ceteteh cunug ifanen. Uqa ceteh cunug odigiannu casac uqana cisdoc jahunen. Uqana cisdoc eu wele saensaen cunugna jahunec bilen. Qilaqa Anut uqa uqana cisdoc jahunec adi caligian eu dana cajaca cunug qasali maadecmin foqagannu cabi i iten. ¹⁰ Wele Anut uqa ceteh oso jahunen, euqa qila uqa uqana tamanecna uqana cisdoc silecca filfil bahic eu ca-

masac muden, king bilecca ilo gagadic odocca age sao ohisna bilegina eu age doqagannu. ¹¹ Wele bahic Anut uqa ceteh oso qee ifanel saen eunadec ceteh i cunug odigiannu cisdon. Odimeiqila uqa Krai Jisas, egen Tibud, uqana cabina odocob ceteh i camasac men. ¹² Odocob ege Krai Jisasnu wawige meleceb uqaca gabangec biluquna. Eunu ege Anut cemenug lecnu ihoc eu du cuhadoqona, ege odi odocnu qee cucuiquna. ¹³ Eunu ija niniadigina, ija agenu sogoigina eunu cain dumanaga culiaun. Ija cesuladigina eunu age binanagaca bilegina.

Pol uqa Efesas tamanec gagadic tawigiannu Anut inondon

¹⁴ Anut uqa Juda danaca Juda dana qee eundecca tanawadi gabanadeceb ege Krai Jisasnu wawige meleceb ege uqaca gabangec Anut cemenug lecnu ihoc oqona gug inu ija Memige Anut amegna gob cehimig inondugina. ¹⁵ Uqa sihul cunug age saona mahanaca bilegina eu age Memega. Odocob uqa sihul cunug age ijanaga aqen. ¹⁶ Ija gob cehimig Anut odi inondugina, uqana kobolkobol cehewanca bahic eunadec gagadic odoc adeceb age Anutna Kisna wawaga gagadic tawigiannu inondugina. ¹⁷ Odocob age Krai Jisasnu wawaga melecna Krai uqa age wawaga dunuh biligiannu inondugina. Odocob agena dana cajaca cunugnu nalunuga mec eu age wawagana wasimeiduec tawigiannu inondugina, eu odiwe na bebeig eu maha gagadic heweceb na duec tawena. ¹⁸ Eunu age Anutna dana cajaca qagoc osoben cunug age Krai Jisasna nalug

mec eu docnu gagadic odocca ihoc. Kraisna nalug mec eu bagalan ben bahic, eu cecelac ben bahic, eu ohis tec bahic, eu mahana dunuh noc bahic. ¹⁹ Odocob age Kraisna nalug mec eu du cuhadooqagan, euqa dana egena cisdoc cunug eu wooldoc. Odocob Anutna duman me bahic cunug eu Anut uqadodocnu am bec eu agenuha am bigian.

²⁰ Aria, Anutna gagadic odoc eu ege wawige cabi ona eu egena cisdoc wooldocnu ihoc odona. Anutna gagadic odoc eu ege Anut odocnu cisdoqona, ege Anut odocnu inondoqona eu cunug wooladecnu cabi ona. ²¹ Ege Anutna tamanec dana cajaca cunug saen qila hibecha gaidgaid Anut Krai Jisasca binanala sulocomun cataneiale! Mele.

4

Ege Kristen ege Krai deweg

¹ Ija Tibudna cabi dana, ija gihacdoc jona biligina. Age Anut toodumeig tutuc cobocnu utaaden. Eunu Anut uqa agenu ceteh cunug Kraisna odonnu ija age tuliadecemin coboc i toodu cobocnu niniadigina. ² Age jogoi cobocca, gemanaga jocosaigca, lalafanagaca odi coboigale. Age cotoga oso uqa me qee odadecebfi age ameg me qee cain wadacdownain. Age nalug mecebmecebeigale. ³ Kis uqa ege wawige osolna bilecnu kobol igina, odocob kobol i ege haluna cinigwe libigecebil ege sihul osolna malol biluquna. Eunu age kobol i hewecnu gagadic meigale. ⁴ Ege dewenige osolca Kis osolca eu bilia. Eu odiwe age ceteh osol dih ocnu sumudi bilegina eunu

Anut utaaden. ⁵ Eu Tibud osol bilia, eu wawige meleec osol nijia, eu wa joigec osol nijia, ⁶ eu Anut osol bilia. Uqa ege dana cajaca cunug Memige, uqa dana cajaca cunug agena ilo bilia, uqa dana cajaca cunug gemo cabi ona, uqa dana cajaca cunug dunuh bilina.

⁷ Kraiss uqa ege eelgec uum igec oso abesabes siwigen. Eu odiwe Anut uqana eelgec uum igec ege abesabes siwigen. ⁸ Anutna jaqec je odi madena:

“Uqa ohis bahic ten eu uqa gihacdoc dana mati bahic cedadeceb osobenca tein.

Odocob uqa dana cajaca bagol adec eu aden,”
ena. *(Buk Song 68.18)*

⁹ Aria, je i “Uqa ohis bahic ten,” eu cel gugnu? Uqana gug eu uqa casac maha dunuh bahic toni non. ¹⁰ Eunu uqa toni non eu uqa saona gun ohis bahic ten. Uqa uqadodoc ceteteh cunug am bigiannu odi odon. ¹¹ Odocob uqana bagol igec eu odi. Dana leih age aposel cabi aden, odocob leih age je hahun madec cabi aden, odocob leih age me je qasali maadec cabi aden, odocob leih age tamanec cofadec cabi aden, odocob leih age me je iwaladec cabi aden. ¹² Uqa Anutna dana cajaca qagoc age Anutna cabi ocnu saciaadugia bili eu odi odon. Odocob uqa tamanec, eu Kraiss deweg, ceheceb gagadic tawigiannu odi odon. ¹³ Uqa odiodi oodon li ege cunug wawige osol gabandu bileqannu, odocob egena wawige meleec eu osol migiannu, odocob ege Anut Melahnu du cuhadoqannu, odocob ege dana ben meqannu eu odi Kraiss uqa dana ben menwe. ¹⁴ Eunu ege mel sim cinigwe haun qee biluqaun, odocob je i faninadec

dana age iwaladegina eu ege macas qahime i wagna cinigwe cain cecelgi lili huhu eiaun. Fan-inadec dana agena iwaladec je eu uhulec, eu dana agena cisdoc himec. Eu fufu cinigwe ege fulugeceb filfil ilag cain coboqaun. ¹⁵ Euqa ege nalug mecca mele je eu maadoqale. Odocob ege dana cajaca wasimeb Kraiswe caleqan, uqa egena ilo. ¹⁶ Uqa uqana deweg cunug cofdona. Uqa deweg amihilon filfil tubadi sogeceb gagadic tawena. Krais uqa amihilon filfil eu meceb deweg gagadic hehdona. Odocob amihilon filfil cunug eu agena cabi me oogin deweg me bahic ben mena, odocob deweg eu uqadodoc nalug mecna ben mena.

Ege wawige meleec dana cajaca Kraisna cebac bilec haunna coboqale

¹⁷⁻¹⁸ Aria, ija Tibud ijanna je i ulauladigina, age haiden dana agena kobolna cain cobowain. Haiden age wawaga eu tahac qon. Eunu agena cisdoc eu ceteh gauc, agena cisdoc eu tuca. Eunu age Anutnu docca qee bilegina, odocob age Anut cebac bilec igina euna qee bilegina. ¹⁹ Age kobol me qee odoginanu majanaga qee adena. Age wal kobol majanagaca qee odocnu gale adena, age kobol me qee filfil gegehinc a odocnu wawaga cajena.

²⁰ Eu Kraisna iwaladec qee! Efesas age kobol i Kraisnadec qee oloin! ²¹ Eu mele bahic cisdugina, age Kraisnu dah mein, odocob age uqana dana cajawe bilecnu mele je Jisasna nijina euna iwaladein. ²² Wele ageha deweg hilah uqadodoc golac me qeenu sililec eu toodu odoloig, eu

agenel qauaadi me qee bahic moloi. Euqa qila age deweg hilah uqana kobol eu huli heleiga. ²³ Age Anut culdecebil agena cisdocca, wawaga madecca waticduadeceb haun ibuldugian. ²⁴ Age Anut deweg haun taceigale, eu Anut uqadodoc hahun qu muden nijia, eu ititomca, eu gunca, eu mele bahic.

²⁵ Eunu age uhulec je cuculeig wawige meleec cotigcotigca mele je madeigale. Ge, ege deweg osol uqana nahanaha biluquna.

²⁶ “Age gemanaga bebeb cain silail mowain,” en.
(*Buk Song 4.4*)

Age gemanaga bebeb cam qee caji lec ninijeb gemanaga bodoeiale. ²⁷ Gemanaga bec eu Setenna bilec cudun cain mudecebil nijiaun. ²⁸ Oso heje on eu haun cain heje oiaun. Euqa oso ihocca qee eu loo utecnu uqa gagadic mimi uqadodoc ebenna cabi ocob ceteh me cali hoiale. ²⁹ Socaec je conoganadec cain cali hoiaun. Ceteh oso cogogec nijecebfu tutuc migiannu je himec madeigale. Je eu eeladec oqagannu age dah mecebil cesuladigian. ³⁰ Kis Gun eu age Anutna dana cajaca bilegina uqana gaga, eu Anut uqana besiadec deelnu qagu madec bilegina uqana sisi mec. Eunu ageha Anutna Kis Gun waug me qee mudecebil cain waloc doiaun. ³¹ Age je me qee gulihinca, olohon becca, gemanaga becca, eu cunug qisacdu hibemdoigale. Age dana cajaca cain galac madowain, cain socaadowain, cain sagagadowain. ³² Age cotigcotignu wawaga nelugca, culunuga occa odudecebodudecebeigale. Anut age Kraisca gabanadec agena silail dahig

celenwe eu odi age cotigcotigna silailha dahig celecebcelecebeigale.

5

Ege Tibudna fulacdocna biluqale

¹ Age Anutna mel sim uqa nalunuga mena, eunu age Anutna kobol toodu odimeig Anut cillon oigale. ² Age wawaga meleec cotogailnu nalunuga mecna coboigale. Eu odiwe Krais uqa egenu nalunige mimei uqadodoc cebac bilec culimei Anutnu ihandon. Ihandoc eu dedeman me bahic wasena.

³ Age wal kobolca, kobol me qee gegehincan, osona ceteh ocnu gale adecca eu cain odowain. Age Anutna dana cajaca qagoc eunu oso age kobol eundec odocnu je cain madeiaun. ⁴ Age Anutna dana cajaca ititomnu age je gegehincan, udoc je me qeeca, lelandoc jeca eu cain madowain. Euqan age Anut hegagan ec himec madeigale. ⁵ Oso uqa wal kobolca, uqa kobol me qee gegehincan, uqa osona ceteh ocnu gale docca eu Kraisna culca Anut mugumige mecca nahan oso qee oiaun, eu mele bahic. Dana eu uqa osona ceteh ocnu gale dona eu uqa kadan tibudnu cuhan fenawe.

⁶ Silail kobol inu dih Anutna gemag bec eu dana age uqana loo je tefacdogina eu agecan hona. Eunu age dana oso cain culdecebil je gaucna qauadeiaun. ⁷ Odimeig age dana eundec age gami cain ihol mowain. ⁸ O Efesas, age wele tucana biloloig, qilaqan age Tibud uqan uqana fulacdocnan madeceb eunan bilegina. Eunu age dana cajaca fulacdoccana bileginawe coboigale. ⁹ Ge, ceteh eu me bahic, ceteh eu ititom, ceteh eu

mele bahic eundec cunug eu fulacdoc uqana aig qoc. ¹⁰ Age Tibud uqa kobol adec gale dona eu docnu cabi oiga. ¹¹ Dana tucana kobol odogina eu ageca cain ihol mowain. Kobol tuca i edec uqana aig qoc eu gauc himec. Euqa age kobol tuca i dana cajaca cunug ihacadecebil camasac mea. ¹² Ge, dana kobol i jahunecna odogina eunu ege je madecnu majanigeca. ¹³ Euqa age ceteteh cedadimeig fulacdocna madecebil uqana gug camasac caleceb dana cajaca cunug age fecnu ihoc. ¹⁴ Odocob ceteteh cunug camasac mena eu fulacdoc ibuldona. Eunu leih age je i madegina: “O dana us nijigina, hina camali cajaga!

Hina cal mecnadec cajecem

Krais uqa fulacdoc ihigian,” egina.

¹⁵ Age agena cobocnu mecii cuhadoiga. Age dana cisdoc silecca qee cinigwe cain cobowain. Age dana cisdoc silecca cinigwe coboigale. ¹⁶ Age Anutna kobol odocnu cabi oiga, ge saen qila eu me qee. ¹⁷ Eunu age cain gad mowain qa Tibud uqa age adi odocnu gale dona eu wali feiga.

¹⁸ Ceu jeceb dalul qoc eu kobol me qee, eunu age ceu jecebil dalul cain aqeiaun. Euqa age Kis culdecebil uqa wawagana am bi ihoc ligiannu odoigale. ¹⁹ Age samnaca, kalamnaca, due Kis Gun iwaladena eunaca je madocobmado-cobeigale. Age conogana wawaganaca Tibudnu due sileigale. ²⁰ Age saen cunugnu ceteteh cunugnu egena Tibud Jisas Krais ijanna Anut Memige gaid hegaga doigale.

Pol uqa gemugail aidagailca maaden

²¹ Age Kraiss binan sulimeig age cotogail agena je todocobtoodocoboigale.

²²⁻²³ Kraiss uqa tamanecna ilo bilina. Tamanec eu Kraiss deweg, odocob Kraiss uqa uqana caha-haadec. Eunu Kraiss uqa tamanecna ilo bilinawe eu odi gemug uqa aideгна ilo bilina. Odocob age Tibudna je toodu odoginawe eu odi aidagail age gemugail agena je toodu odoigale. ²⁴ Tamanec uqa Kraissna je toodu odonawe eu odi aidagail ageha gemugail agena je cunug toodu odoigale.

²⁵ Kraiss uqa tamanecnu nalug mimei uqa tamanec cesuldocnu uqana cebac bilec culenwe eu odi dana age aidagailnu nalunuga meigale.

²⁶ Uqa tamanec Anutna jena wa joudimeisoidocob Anutnu qagu biligiannu eu odi odon. ²⁷ Eunu uqa tamanec eu u ahumei uqadodoc amegna me bahic tawigiannu odi odon. Odocob tamanec eu gegehınca qee, gononca qeeca, ceteh eu cinigwe eccaqee eu odi biligiannu odon. Odocob tamanec eu cahuldocca qee, uqa gun biligiannu odon.

²⁸ Eunu dana agedodoc deweneganu nalug meginawe eu odi age aidagailnu nalunuga meigale. Dana uqa aidegnu nalug mena eu uqadodocnu nalug mena. ²⁹ Ge, dana oso uqadodoc deweg sagagdona eu odi qee nijel. Euqa Kraiss uqa tamanec cofdonawe eu odi dana uqa deweg sab utimeis me cofdona. ³⁰ Ege Kraiss dewegna amihilon eunu uqa odi odona. ³¹ Anutna jaqec je eu odi madena:

“Gug inu dana uqa memeg anagca culalimeis aidegca gabanalecebil biluwasan.

Odocob lecis ale deweg osol biluwasan,” ena.

(Jenesis 2.24)

³² Jahunec gug ben eu Anutna jaqec je ina bilia. Ija cisdugina, uqana gug eu Krais uqana tamanecca ec madena. ³³ Euqa ageha odi odoigale. Dana cunug age agedodocnu nalunuga meginawe eu odi age aidagailnu nalunuga meigale. Odocob caja cunug age gemugail agena je toodu feigale.

6

Pol uqa mel sim anagail memegailcanu maden

¹ Mel sim age anagail memegailca je madecebil toodu odoigale. Age cunug Tibudca gabanadec bilegina eunu kobol tutuc i odoiga. ² Loo je uqana je gagadic oso eu odi madena, “Hina anin memenca je madecebil toodu odogale,” ena. Je gagadic eu je hahun oso tubdoc aquniadec nijia.

³ Je hahun eu odi tubdu madena:

“Eunu cunug hinanu me biligian,

odocob hina maha ina saen cecelacca bilegan,” ena. *(Loo*

5.16)

⁴ Memegail age agena mel sim elalenedecebil gemanaga bigiannu cain odowain. Euqa age cofadi cuhadumeig Tibudna je ihoc mecnaca iwaladeigale.

Pol uqa begabeg meh cabi dana agena cofadec danaca eunu maden

⁵ Begabeg meh cabi dana age agena cofadec dana maha ina bilegina eu age conoga toodu odoigale. Age cucuiecca, qelelecca, wawaga osolca cabi oiga, eu odiwe age Kraisnu cabi ogina.

⁶ Age cofaadebil age qauaadi amagana himec cabi

me ogina eu age cabi me ogina ec madecnu odi cain odowain. Euqa age Kraisna cabi dana eu odi cabi oiga, age Anutna gale doc todocnu wawaga ceeleiale. ⁷ Age wawaga mena cabi oiga. Age eu dana agena cabi himec cain owain, ge eu age Tibudna cabiha ogina eu odi oiga. ⁸ Age dogina, dana oso uqa me odona, eu begabeg meh cabi danafo, qee cofadec danafo, Tibud uqa dana eundec cunug ameg mena wadacadigian, eu agena me odoc ihocihoc mumudi adigian.

⁹ Odiha age cofadec agena begabeg meh cabi dana mena odadeigale, age cucuiuqagannu kobolna cain odadowain. Age dogina, begabeg meh cabi dana agena Ben, cofadecca agena Ben uqa saona gunna bilina, odocob uqa begabeg meh cabi danaca cofadec danaca cunug gug osolna dih ihocihoc gesiladena.

Kristen age han dana cinigwe

¹⁰ Ija cit qoc je oso maadigen. Age Tibudca gabanadec bilimeig uqana gagadic odocnu cisdoiga. Uqa uenna tatawi gagadic meigale. ¹¹ Age Anutna han cadec bala cunug taceigale. Euna age Seten nawel cocobi wooladecnu hohob age uqana cisdoc me qee euna tiec tawecebil ihoc ligiannu. ¹² Ge, ege age dana dewenega golana-gaca eundecca qee cadoqona qa ege tibud me qee eundecca, kis ilo gagadic odoc eundecca, maha cofadec age tu saen ina maha cunug cofadegina eundecca, buga me qee mati bahic age sao ohisna isec cobogina eundecca eu age gami cadoqona. ¹³ Eunu age Anutna han cadec bala eu umeig

cunug taceigale. Eunu Setenna qisol mec deel hocob age agena mahana tiec tawecnu ihoc. Odocob age han cadi hedumeig tawecnu ihoc.

¹⁴ Gagadic taweiga. Odocob age umunugana mele je oologamca taqea. Odimeig age hannu jamel ititomca culunugana jahuldocnu be cawi taweigale. ¹⁵ Age malol bilecnu me je hewi cobocnu eu jaimaga tacecna taci taweigale. ¹⁶ Age wawaga meleec eu agena gelac cacudocnu heweiga, eu cain bahic dahiniga celeiaun. Gelac eu qisol mec gug uqana jalaig jaca guseceb hu qocob cunug cafuligiannu ihoc. ¹⁷ Age caha haadec katakat eu age ilomoga jahuldocnu umeig taceigale. Age Kisna han sigin, eu Anutna je, umeig ebenegana heweigale. ¹⁸ Age Kis wawaga ihoc leceb je madocnaca ninidocnaca saen gaid inondoigale. Gug inu age mecii cuhadoigale. Age cain jaen mudowain. Age gaid Anutna dana cajaca qagoc cesuladecnu inondoigale. ¹⁹ Ageha ija me je uqana jahunec gug camasac mecnu madige bili saciadugen euna Anut uqa je iteceb ija me je saluqi u maadigennu ijanu inondoigale. ²⁰ Ija me je i saadecnu dana sos, ija gug inu gihacdoc jona senna qagitec biligina. Ija me je saluqi u maadigen eu odi maadoum igina eunu Anut inondoiga.

Cit qoc feele adec je

²¹ Tikikas egena wawige meleec cotige eu ege nalug moqona, uqa Tibudna cabi tutuc ona, uqa ijanu je cunug saadigian. Eunu age ija adi biligina, adi odigina eunu doqagan. ²² Ija gug inu age ege adi biluquna doqagannuca, odocob

uqa age wawaga gagadic mudadigiannuca ageca suldocomin lena.

²³ Malol bilec ageca biliale. Memige Anutca Jisas Krais Tibudca ale cesuladecebil age wawaga meleceeb wawige meleec cotigeil nalunuga meigale. ²⁴ Cunug age egena Tibud Jisas Kraisnu nalug mecebil catanena eu Anutna eelgec uum igec eu ageca biliale.

BAL CEHEC JE HAUN
Genesis and the New Testament in the Amele
language of Papua New Guinea
Buk Stat na Nupela Testamen long tokples Amele long
Niugini

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

PDF generated using Haiola and XeLaTeX on 11 Nov 2022 from source files dated 9 Oct 2020

efcfe8ba-c483-58bb-922c-05455e0b9491